

四庫全書

集部

欽定四庫全書

兩宋名賢小集卷二百五十九

宋 陳 思 編

元 陳世隆 補

鶴山詩集

魏了翁字華父號鶴山邛州蒲江人慶元五年進士
理宗朝累官簽書樞密院事改資政殿學士福州安
撫使卒贈太師謚文靖有鶴山集

登萬象樓和計次陽韻

塵纓羈我身對景慵著語青山喚倚欄壯氣臨頰汝層
雲捲油幕萬嶺眇煙縷酒闌一橫笛樓前葉似雨

七夕南定樓飲同官

誰將明星貼天宇州國宮垣象官府更將四七隨天旋
常以昏中殷四序迢迢河漢衡秋旻前有蒼龍履玄武
牽牛正向西南來左右兩旗北河鼓鼓星之側為天桴
鼓上三星為織女何年入號天女孫便把牛郎擬夫婦

不知此是天關梁河漢之津有常度晦明伏見莫非教
肯為文人給嘲侮班曹庾謝猶讐言世上兒曹更堪數
臨風三誦大東詩須信辭章有今古

閣學袁侍郎變以朝鯉豢龍兩圖見寄索和

物生宇宙間巨細統有宗鱗蟲三百餘厥長惟稱龍
霧瀾六合神物閱千重維時赤鯉公坐制纖鱗窮纖鱗
何足言什百來追蹤亦有橫江鱗望洋喪其雄于于圍
圍然等辨殊卑崇一鯪掉頭去愬然若將終三公不易

介誰謂患不恭魯生陋漢儀商皓嬰秦鋒行吾之所安
匪以驚愚庸又如秦漢後俗學千載同卓哉無極論上

配禹孟功吾言聊自警毋諂惟少通

右朝
鯉

乾坤包萬有納納百囊畧人位乎兩間利與害為禦一
氣貫四時五風甘十雨神龍以為畜擾御不予侮河有
背負圖庭無蔡流女義理之不明人情自疑沮範圍吾
職分往往苦違拒同室操戈鋌一身隔肺腑帝王秦龍
意棄置那復取四靈非不露有不得其所生息之相吹

古今類如許古人體天意萬物我其主蟲莫知於龍拊
循如士伍今何故無人亦足驗胸府聲和鳳來儀心平
轡如組矧伊人中瑞治亂係嘿語欲入而閉門誰出不

由戶茲事關人心作詩附農圃

右泰
龍

贈畫工王三錫傳神

氣質紛不齊四海無似人藉令貌相近氣有醇不醇善
觀人品者儀貌與機神正邪眸子見善惡眉間分且如
孔與虎二人自非倫而俱類孔子俗眼何昏昏古人有

夢語便知為良臣又能記眉目曉然得其真此雖與神
會難與淺者論王生歸為我試語司寇君此理充得去
三代同此民

遊上天竺

風波滿平地世路繞羊腸急欲逃塵網遙登選佛場雲
深午猶暝竹密夏生涼興逸忘歸去高眠借石牀

次韻知常德袁尊固監丞送別

細把行藏為子評只知盡分敢微名出如有益殷三聘

用不能行魯兩生此道古人如飲食後來竈婢或猜驚
子雲亦號知書者猶把商山作採榮

孔訓原無實對名只言為己與求人能知管仲不為諒
便識殷賢都是仁義利兩途消處長古今一理屈中伸
自從聖學寥寥後千百年誰信得真

別來歲月爾滔滔流落天涯忽此遭萬木辭榮秋意澹
百川歸壑峴容高笑看海上兩蝸角閒禿山中千兔毫
若向顏曾得消息直須奴僕命離騷

夕陽春處是吾家水繞山環路轉賒
感感四方渾未定茫茫大化渺無涯
歸來已恨十年晚老去一作却空嗟雙鬢華
各願及時宗令德萬鍾於我本何加

題桃源圖

伏勝高堂書已出竇公制氏樂猶傳
魯生力破秦儀陋商皓終扶漢鼎顛
隱者寧無人禮義武陵匪獨我山川
若將此地為真有亂我彝倫六百年

題謝畊道一犁春雨圖

沐頭夜雨滴到明邨南邨北春水生老婦携兒出門去
老翁赤脚呵牛畊一雙不借挂木杪半破夫須衝曉行
耕罷洗泥枕犢鼻卧看人間蠻觸爭

和靖州判官陳子從山水圖十首

予遷靖州判官陳子從珪為鄰嘗從容出示靈竹僧
不二山水圖其未有乃祖乃父十詩前賢風裁邈不
可及取次原韻以識高山景行之仰云

彭蠡歸舟

外物羈繫人無退亦無遂媿彼自由身朝發而夕至

山堂曠望

山堂有何觀四時互興歇萬物隨天根東生復西滅

重湖汎月

水月皆內景入秋倍清輝世無善觀者滔滔吾誰歸

星灣晚酌

士非耕釣者而從蓑笠翁人生貴適意莘渭亦時中

雨後觀瀑

潭氣蒸前山起自膚寸微競看千丈瀑不悟片雲飛

松逕晚步

松柏不受彫此亦易知耳須看竹有筠與竹相表裏

谿上賦詩

莫作流看谿天命無窮已詩人若知得千古可坐致

林下避暑

散髮避炎暑炎暑苦相尋云何對大賓不見汗霑襟

載酒尋梅

松竹貫寒暑而梅時往來不知復姤意隨人漫徘徊

雪中訪友

懷人得清晤此樂浩無期剡谿興盡返未喻伐木詩

夏港僧舍

迅商呼不來午汗如翻漿道人空萬緣邂逅贊公房虛
室千世界圓滿一鉢囊碧雲護兜率白日耀普光蕭蕭
蘆葦中著此清淨坊鑿師徒西來一喝登慈航唾手舉
慧及斫斷煩惱韁邀我供煮餅心地陡清涼官焙破蒼

壁挑笙漲寒江從師問究竟室兩照殘陽

寄題雅州胥園

胥君欣然來錦囊背奚奴探囊發詩卷一一卿大夫未
識胥園面詩卷自畫圖埽石卧竹影長鋪斲芋區胥君
於此時林泉傲金朱懶予本丘壑誤被塵纓縛每逢漫
浪友慚愧紅塵脚會當尋茲盟酌此一大錯

禹穴

禹穴無從一鑄通禹陵元在亂山中飲泉寔石皆如舊

誤却東遊太史公

寄題鄒子震父梅屋

陽和運一氣萬物生意回
殿冬而魁春幽香先到梅
華
匪時世糴實有調鼎材
主人約歲寒結廬江之洄

送張匠監忠恕以祕閣知贛州

西南間氣忠獻公
一生心事天與通
才高志廣無處著
獨倚衡疑望關洛
九州風露方漫漫
養回殘夢歸餘干
唯將一念遺孫子
長與世間立人紀
宣公端明今在無

我生不識慚非夫寧知中歲遇行甫歷歷典刑猶祖父
試從微處覘經綸中邊玉潔無纖塵大河滔滔恣羣飲
逡巡獨惜障泥錦曉庭戒仗暗無聲掣纓振鬣時時鳴
京師郵吏自相語張公立朝我良苦不知書疏何所言
每一論奏人爭傳好名之人能遜國而於豆羹見詞色
反覆耐看不可瑕此事無素能然耶我從同朝一千日
見公造次皆是物寄聲為賀贛州民朝廷為汝輟爭臣
卻須更問蕭太傅中朝外郡誰當慮

塵外亭

高出雲端絕世喧碧天秋淨鏡無痕塵緣不向塵中見
聊與遊人洗眼根

天竺寺

野塘風細度香蓮碧澗雲深響玉泉從此西湖不須到
淡煙寒月一家天

寶雲寺

偶隨鷗鳥度寒溪寂寂禪關半掩扉翠玉萬竿迎曉履

欲憑風露濯塵衣

馬祖巖


去來踪蹟等遊塵
誰向蘧廬覓道根
巖穴故應無別異
鷓鴣題空有姓名存

塵外亭

林遠渾無鳥雀喧
山青那覓燒霆痕
三千眼界雲霄上
十萬人家草樹根

天竺山

好山堆翠擁金蓮
花屋籠雲傍石泉
秋沼英蕖半開謝
直須饒占一壺天



兩宋名賢小集卷二百五十九

欽定四庫全書

集部

兩宋名賢小集卷二百

六十三至
六十三

詳校官中書臣孫 溶

助教臣常循覆助

總校官編修臣王 燕 緒

校對官學正臣周 鉉

謄錄監生臣趙金簡

欽定四庫全書

兩宋名賢小集卷二百六十

宋 陳思 編

元 陳世隆 補

靖逸小集

葉紹翁字嗣宗建安人博學工詩嘗居錢唐卜隱於
西湖之濱與葛天民往來酬倡靖逸小藁一卷辭澹
意遠頗耐人咀味如春色滿園關不住一枝紅杏出

牆來至今膾炙人口雖邨巷婦稚皆能誦之梅屋許
棐贈詩云聲華馥似當風桂氣味清於著露蘭斯言
可謂雅稱著有四朝見聞錄撫羅遺佚足補正史之
闕不徒屑屑以聲韻見長者

登謝履亭贈謝行之

在天竺

君家靈運有山癖平生費却幾兩屐從人喚渠作山賊
內史風流定誰識西窓小憩足力疲夢賦池塘春草詩
只今屐朽詩不朽五字句法誰人追天台覽遍興未已

天竺山前聽流水秦人稱帝魯連恥寧向蒼苔留屐齒

乙庵

行之
自號

是渠幾世孫登山認得屐齒痕摩挲苔石坐

良久便欲老此崑之根吾儂勸渠且歸去請君更學遙

遙祖遙遙之祖宜阿誰曾出東山作

音
佐

霖雨乙菴未省

却問儂莫是當年折屐翁

西湖秋晚

愛山不買城中地畏客長撐屋後船荷葉無多秋事晚

又同鷗鷺過殘年

題鄂王墓

萬古知心只老天英雄堪恨復堪憐如君更緩須臾死
彼國安能八十年漠漠凝塵空偃月堂堂遺像在凌烟
蚤知埋骨西湖路學取鷓夷理釣船

聞頂山徐道人改卜

先生新卜宅只許白雲知野蜜和蜂割蠟花帶蝶移坐
諳苔石穩醉忘木橋危屋後寒梅放因風寄一枝

游園不值

應憐屐齒印蒼苔小扣柴扉久不開
春色滿園關不住
一枝紅杏出牆來

仙興

金書宮殿玉闌干
雪瀑泉飛洞口寒
日暮仙翁騎鶴去
碧桃花滿石棊盤

秋日遊龍井

引道煩雙鶴攜琴倩一童
竹光杯影裏人語水聲中
不雨雲常濕無霜葉自紅
我來何所事端為聽松風

出圮關二里

脫衣命僕洗塵埃
籬落人家未見梅
出得城門能幾步
船頭便有白鷗來

野蝶

銀為鬚翅粉為肌
驅役春風不解肥
桃李上林無分到
可憐却傍菜花飛

嘉興界

平野無山見盡天
九分蘆葦一分烟
悠悠綠水分枝港

撐出南鄰放鴨船

烟村

隱隱烟村聞犬吠
欲尋尋不見人家只於橋斷溪回處
流出碧桃三數花

石頭感古

夷甫諸人者龜趺已故立但能揮玉麈不解冠纓整
正朔從江左經營僅石頭中原雖可望不忍上層樓

葛天民隱居

種竹成新列移蘭即舊陰老鎬猶有耳古柳已無心得
句漆杯滿看爐到夜深篝燈聊點校春水沒衣砧

九日呈真直院

秋風吹客客思家破帽從渠自在斜腸斷故山歸未得
借人籬落種黃花

貴遊

五陵年少儘風流十日安排一日遊林下幽人差省事
筆牀茶竈便登舟

寓居

雲補青山缺琴銷白日長
鷗從雨外沒蛇入樹間藏
客久衣常黑童鬢髮半黃
螢多隣舍少此意自淒涼

無酒難留客借書方入城
洗衣知水落貪睡畏窓明
野竹藤纏殺枯枝草寄生
十年林下隱差覺世緣輕

田家三詠

織籬為界編紅槿排石成
橋接斷塍埜老生涯差省事
一間茅屋兩池菱

田因水壞秧重播家為蠶忙戶緊關黃犢歸來莎草潤
綠桑采盡竹梯閒

抱兒更送田頭飯畫髻濃調竈額烟爭信春風紅袖女
綠楊庭院正秋千

送馮濟川歸蜀

勇喚東吳萬里船卓囊來奏九重天一官豈為蘇洵冗
諸老寧容賈誼先滿載月歸應有命便耕雲去豈無田
竹枝歌罷蓬窓掩到此相思淚黯然

賦葛天民栽葦

葉礙漁舟入叢分水國寬低回藏鷺渚彷彿釣魚竿蕩
戶和萍送溪翁當竹看所憐如許節不耐雪霜寒

田舍小憩

犬馴迎且吠兒小笑還啼櫻熟施魚網桑空卧竹梯枯
枝禽啄折野草鹿眠低屋後登山路牛欄更向西

青溪閣

江總能文士空貽狎客名舊收荒草占廢圃野人耕古

柳無多樹新蟬第一聲青溪固無恙依舊帶孤城

訪隱者

不作王門夢來敲隱者關童先孤鶴化雲伴一身閒碍
笋新移路低牆為看山幾回松下去鋤得茯苓還

幽居書事

窓開雙佛塔水遶數魚家酒剩沽鄰里時平買釣車童
閒惟伴鶴樹老自成槎枕上關心事侵晨掃落花

訪龍井山中村叟

雨打荒籬豆莢垂柴門未啓立多時客來自掘蹲鷓煮
旋拾枯松三數枝

西溪

一溪橫木過前溪村女齊登採藥梯獨立衡門春雨細
白雞飛上樹梢啼

和葛天民呈吳韜仲韻賦其庭館所有

江遠潮痕細城回路勢斜竹行穿砌笋風墮過牆花篆
葉蟲留字銜泥燕理家主人清到骨相對只杯茶

敬陪直院右史上已後一日西齋之集

清時天上詔書稀
曲水從游許布衣
挿羽滿浮寒食酒
倚闌同憶故山薇
碧桃繞觀春風靜
柔櫓搖汀夕照微
慨想蘭亭如昨日
沙鷗飛下釣魚磯

贈陳宗之

官河深水綠悠悠
門外梧桐數葉秋
中有武林陳學士
吟詩消遣一生愁

十載京塵染布衣
西湖烟雨與心違
隨車尚有書千卷

擬向君家賣却歸

題山間老友壁

山間雖寂靜未得事全無鋤地留莎草添泉養石蒲庭
除風自掃身世月同孤老去知禪味松間試結趺

寄湖上黃教授佑甫

門幽綠近寺官冷未成家樓借山為障風吹水作花詩
方酬北礪經義節南華間說新雛鳳賓來解喚茶

表忠觀韓小道人

觀裡韓風子無心似有靈繞廊時自語捫風故忘形午
曝松簷暖晨飧柏葉青客來知有饋迎笑立中庭

夜書所見

蕭蕭梧葉送寒聲江上秋風動客情知有兒童捉促織
夜深籬落一燈明

訪隱者

開門迎客著山袍井畔獼猴一樹桃兒向草間尋落菓
妻從牆角過香醪舊栽松子今能大音墮新起茅堂不甚

高歷遍貴遊無此味
韭和春雨笋和糟

題孫端甫別墅

幽居地僻少人知
野水春風枳樹籬
檢歷預尋移竹日
題牆閒記種花時
堪嗤狡兔須三窟
只學鷓鴣占一枝
淨掃綠苔斟濁酒
鄰家吹過野棠梨

寄趙眉翁二首

兩度馳書未報音
溫陵尺紙定千金
多應驛使曾相訪
短艇烟波無處尋

君王未肯賜西湖鷗鷺叢中借地居
憔悴風姿令釣叟
癡心猶望故人書

紙帳

五色流蘇不用垂楮衾木枕更相宜
高眠但許留禪客
低唱應難著侍兒
白似雪窓微霽後
暖於酒力半醺時
蒲團靜學觀身法
歲晚工夫要自知

謁半山祠

歸去田疇問老農
力行新法竟何功
已知供佛追前過

尚惜修書謝數公
塑像難陪夫子壁
古祠誰訪覺王宮
都來二百年間事
燕麥戎葵幾度風

過崇德

野塍泉自注
斷岸柳空存
雨霽雲開塔
船過犬吠門
柴扉斜著水草
逕別通村翻
羨田家樂
盈盈老瓦盆

鷺

無事時來立葑田
幾回鷺去為歸船
霜姿不特他人愛
照影滄波亦自憐

詠先牌

相隨萬里途汝豈被名驅挂壁疑何用辭家不可無店
翁先洒掃津吏認稱呼舉子無錢刻惟將故紙糊

舟次崇德

倦身只合臥家林客裏消磨感慨心水國逢春梅未見
山城到午露猶深地名不記維舟問酒味曾諳入巷尋
泛宅浮家何日了莊頭栽竹綠成陰

發長安堰

夏老蟲聲切
晨興草氣香
買瓜依綠樹
出水得青秧
船聚知村近
牛閒覺晝長
雙鳧蓮葉蕩
無限意蒼茫

苔錢

家貧地上却錢流
朽貫年深不可收
若使用之堪買爵
等閒門巷亦封侯

兩宋名賢小集卷二百六十

欽定四庫全書

兩宋名賢小集卷二百六十一

宋 陳 思 編

元 陳世隆 補

山居存藁

陳必復字无咎號葯房闌人嘉定時卜居封禺山中
結屋數椽題曰葯房吟所有山居存藁俱五七言律
詩自為序

山居

接砌斜通徑綠籬矮結牆地卑蝸篆壁山暖蜜分房過
雨林亭靜落花春晝長幽居省事猶有課詩忙

領客游聞人氏省庵園

半夜雨方位一春晴不常倚欄聽鳥語開戶納花香庭
暮竹陰淨池風水氣涼幾番吟未穩步月細平章

構得

構得數簷椽閒身與靜便半簾花影碎一樹鳥聲圓吟

苦瘦於舊春寒多似前閉門無客過心事付琴邊

百五節

獨遊苦無侶偶步到前川春水綠於染山花紅欲然冷
煙寒食月小雨浴蠶天此去嬉游少風光又一年

贈林尚仁自號端隱

谿邊著吟屋亦足老生涯洗硯渾池水敲碁落案花客
來多載酒童去自煎茶愛爾丰標異逢人滿口誇

舟中得催字

出郭少晴日春陰欲釀梅岸痕
新雨過島色曉雲開數
鳥煙中落一帆天外來
谿行正如畫頻報長年催

客枕

客枕偏饒睡春歸尚擁綿
屋深燈易暈漏短夢難圓
棲鳥驚涼夜鬧蛙喧
雨天一聲柔櫓過何處上谿船

歸自德清

午陰雲弄日水漲浪侵磯
小港漁舟聚深村酒戶稀
牛閒童自睡蠶熟客方歸
隔岸人家近綠聲出翠微

游前谿西庵

為愛僧居雅時來扣野扉
沼清魚可數軒靜客忘歸
脩竹負牆立幽禽背水飛
道人差不俗洗耳聽絃微

贈張駒自號牧隱

乍見語相合苦吟心更親
老於琴得趣隱與牧為隣
一夜簷花雨十年江樹春
所交半湖海恨晚識斯人

東野故居

先生高隱地遺跡尚堪尋
出郭祇疑近入村還覺深秋

光淡平野暄色帶遙岑幾度祠邊過詩成不敢吟

響應寺

步屨窮幽討扶筇上碧尖山高秋易瘦瀑小雨方添寺
老僧單少潭深廟祀嚴平生立壑志愛此結茆檐

宿龍山精舍

偶貪禪宇靜襜被到深林夜榻僧同話寒簷客自吟窓
明疑積雪樹黑怪常陰猶恨匆匆出丁寧約重尋

僧房

結廬脩竹裏身外世緣輕滑几淨如拭小窓低更明夜
深留佛火人靜聽鐘聲共撥壚灰坐跏趺對短檠

山中書事

天氣如春盎連朝未有霜數蟬嘶老木一鳥渡寒塘風
竹寫晴影水花臨曉妝靜中觀物化此意等葦黃

曉步

清曉步幽逕庭蕪帶綠莎籬根惟有菊池面已無荷高
樹蟬聲急遠山寒色多小窓風日轉便覺似春和

吳江道中

葉老蠶登箔泥肥燕葦窠曉風帆腹飽夜雨拖梢我久
客交游少一春行役多短篷終日坐煮茗且高歌

和客用韻

麥風翻蝶夢花露濕蜂窠水濶浪痕帖雨晴雲氣我酒
功書下下詩料辦多多擬喚三高起豪吟雜短歌

舟行崇德

落日掛征帆西風客袂單燈明村店近船重水程寬蘆

夢作秋意汀洲生晚寒鐘聲煙外寺山色夢中看

嘉禾境上

聯疇岡勢斷缺岸浪痕垂野店茆柴酒人家槿樹籬逆
風魚上少連雨稻開遲客路秋偏好歸程盡是詩

寄石泉雲間明府叔

容易成離索臨分重忍言夜船楊柳岸曉枕荻花村山
雨斷雲脚豁風生浪痕懸知自公退懷抱欠同論

異政人能說新吟客為傳一官清似水萬事信於天養

鶴分厨料收書出俸錢
畫庭少公事閉閣抱琴眠
卧念相從樂杜門岑寂中
曙窓報晴色寒葉語秋風
別去詩難穩愁來酒易空
相看才數驛好為寄書筒

席上和林端隱韻

雲壓簷花重谿禽濕不飛
煙林生暝色雨砌上苔衣
暮鼓深村急疎鐘遠寺微
吟窓得新句寫向錦囊歸

梅花

瘦得冰肌骨亦清
詩人於爾獨關情
孤高不受塵埃澆

潔白猶嫌縞練輕
天下有花皆北面
歲寒惟雪可同盟
當時只欠靈均識
不與離騷寫姓名

偶成

遶屋栽梅亦可人
最憐夏月綠陰清
前村雨過山如洗
深徑風來竹自鳴
滌硯不嫌池水冷
寫書愛傍午窓明
近吟未許人知得
且向梅邊隱姓名

舟中效東坡用韻

底事京塵踏軟紅
又隨征棹過吳淞
人家半在桑柘住

春水忽迷蘆葦叢赤蟹白魚令稍稍紅櫻紫笋已匆匆
船窓盡日看山色多少好山供眼中

兩宋名賢小集卷二百六十一

欽定四庫全書

兩宋名賢小集卷二百六十二

宋 陳思 編

元 陳世隆 補

方泉詩集

周文璞字晉僊一字野齋穀陽人其母禱於狼山而生少聰慧以能詩稱寧宗時仕為內府守藏史旋以事去官卜居於吳之鳳山山有方泉遂以自號有方

泉集三卷

臯橋

伯鸞出京師慷慨歌五噫豈無濟時心升降與我違有
來適吳中春梁掾寒饑吳人臯伯通舍之慰窮棲方志
雖或除此橋猶可稽伯鸞號逸民佳傳照綠綈伯通賴
有此庶幾與之齊至今閭門外兩冢陪要離纍纍各高
大冥冥春草萋古者賢哲人不計鳳與雞焜燿亦偶爾
埋沒何淒兮出語賀兩公亦以昌吾詩

堯章金銅佛塔歌

白石招我入書齋使我速禮金塗塔我疑此塔非世有
白石云是錢王禁中物上作如來捨身相饑鷹餓虎分
相向拈起靈山受記時龍天帝釋應惆悵形模遠自流
沙至鑄出今回更精緻錢王納土歸京師流落多在西
湖寺錢王本是英雄人白蓮花現國主身蛇鄉虎落狗
脚朕何如紅袍玉帶稱功臣天封圻開即退聽兩浙不
聞笳鼓競歸來佛子作護持大師尚父尚書令一枚傳

到白石生生令但有能詩聲同袍秦外鉅師兄哦詩禮
塔作佛事同喫地壚山芋羹何曾薰陸綺牀供但見相
輪銅綠明哦詩禮塔猶未畢蘆葉低飛山雨濕

初至長子寺

雲杪熒熒一塔燈覺皇舍利寶烟凝山門推上三更月
似照前朝禮拜僧

回次秣陵

我行古井邑北風吹倒人旗店語簇簇石路聲鞦韆下

車得少憩亭午聽司晨豈但田杭香更覺村醪醇懷哉
厭王氣契濶毋重陳舊為赫陵尉今為鍾山神

哦松夏夜

雅頌聲流到楚詞更無人見獨看時池頭五粒初搖動
却替幽人說舊時

鷓鴣

夜聞春雨來濃綠淨於洗有禽自南翥自呼不得已豈
非湘川下或自江左起黃陵見哀妃白下感遊子仍多

憂其兄宛轉深樹裏汝兄今何在荆棘日靡靡豈非囚
空山或已投逝水年深桎梏化波冷皮肉死鷓鴣謹勿
痛此係造物理吾若破折言汝恨入骨髓風吹慈竹林
苔暈上深紫吾亦念故鄉日夜夢鄰里不如各歸休闕
月照西鄙

懷何月朔

星星鬢髮卧林丘詔使東川作郡侯髯叟望公來海嶠
瘦兵迎守去夔州珍圖想掛茅齋壁巧石應隨竹釘

闕

教得巴童歌舞好侍郎千萬却歸休

瀨上懷古

有孟正曜祠堂

古寺闕岑鬱空梁懸齋魚神坐既欹仄德容亦饑虛先
生貧有命山僧樂無餘長安滿市花足馬吟九衢寥寥
北邙山而誰噫荒墟豈有先生者不如山僧歟盲風振
茗華重露落芙蓉何當醉尉歸方坐釣水隅

瀨上貞女祠

估客征夫上野橋錦襦玉瑱亦蕭條人間多少乘除事

到了英雄恨不消

銅雀研

君王有遺令，婢子守空臺。遙望西陵下，漆燈照鴟梠。玉
顏闕，釵澤松栢生悲哀。曾見短歌行，想像姦雄才。清泉
沈金彩，古煙凝紫灰。零落故瓦在，雕鑿若陶坯。為人作
書研，詞章出詆諧。上下千載間，流轉何悠哉。那知墟中
人，天命不復來。齊昏亦披猖，增三築。崔嵬年年漳河頭，

野棠如雪開

丘慶餘畫兔

家住棲賢雲泉石恣幽討寫出明視孫眉目增媚好
日行跋屐衣褐坐芳草脫身文字禍見機恨不早仰候
月盈縮脩眉幾回掃迷離望靈藥青松為三倒山人書
姓名欲使好事考

夜坐讀書

此生無耽嗜獨具愛書癖旁搜固未暇乍見亦畧識塵
土苦見汗更苦官事逼紙燈既自剪竹牖仍僕織山邑

少文獻有亦何自覓隨行五升瓶一歲無滴漚向來長
安市閭之嘗竟夕悵然夢裏去莽莽雲雨側哦此謂寒
蟬夜漏三十刻

春雪

崇禧山館似官居二月寒風峭有餘傲吏吟哦空壁下
野童放散夜堂初熒熒宿火煨村酒煜煜殘燈鏡道書
勿聽打窓聲更急快移銀礫上枯株

鶴廟

櫻桃花覆地古廟自青春
帳裏還丹使山中採藥人
風林嗥黑虎雲路列班麟
欲見神君面連朝禮北辰

玉晨口占

風鳴長史朝天栢草護仙翁
瘞劒瑩瑞像殿前亡馬跡
養龍池上有鼉鳴

華道士白胭脂

蕭史水銀粉番女紅藍花
狂奴愛風調脂澤遂成家
鏡開青峽月衣近赤城霞
欲下人間世榭林棲晚鷗

杜鵑花

雲樹重重和淚吟
故宮遺廟有知音
秦吳萬里皆芳草
染到山花恨最深

新柳

長條導幽情
淨色穿戶牖
酸風釀如醋
少待濃似酒
颭颭金絲垂
滿眼遮老醜

王道士庵

出家纔二十
小築契初心
水浸籬根冷
苔封井臼深
猿

啼天慘慘犬吠月陰陰又踞藜牀坐焚香鼓衲琴

南華陽洞

稽首遊名山駕言入華陽南洞極秘怪松翠泉水香曲
几妙隸畫殘碣刊靈章俛首試一讀冷風襲綃裳守巷
敬愛客暖我紫朮湯遺我鵝眼錢云是洞所藏往有尋
幽徒入見黃金牆侈心或已起幾受奇鬼戕身儻獲會
過敢恨飛蓬霜更丐一片土小築安閒房朝披神芝圖
暮試飢飯方

金牛洞

凌兢下危梯，俯偃出深穴。
回身避雲霧，偃面眎日月。
藥苗護谿筍，竹節截巖蘂。
安知幽蹊下，有此大奇絕。
金牛鏗光景，仙課尚可閱。
岡頭春已半，枸杞如點血。
便恐顛風興，橫吹石崖裂。

山行行歌十首

受籙壇前雲更長，春風漠漠杏花香。
峯回路轉無人處，恰見天書字數行。

竦立雕珉萬萬層雲頭晃晃現觚稜野人自愛深幽景
只是尋常不見僧

道院中間沐髮容施來元自贊皇公君能百拜香煙下
不怕丹瓊路不通

蟲蛀黃連徹夜焚秦謠楚誦少人聞近前欲問新宮信
鶴帶靈芝入暮雲

帶淺人家隱樹深嬾晴天色弄雲陰好風嬾嬾穿林去
吹散松花似鬱金

遊遊自是不思歸
花氣蒸衣氣力微
拋棄文書亡俗累
巖猿吟後閉山扉

天風穩送步虛聲
雜和漫山檜栢鳴
遠望山腰多白石
細看知是野人行

中峯道士藥珠丹
曾與神仙玉煉顏
見說醉來燒隱訣
藥鑪蕭瑟卧空山

紫陽道院古丹青
恨渠猶畫化緣經
晚香滅没人歸後
自有天風撼玉鈴

砌穴蕭森隔土橋
項梁城畔最蕭條
羽衣歌些招魂鬼
直送旂旗上九霄

壬戌春日

自從憂患長精神
兀坐齋房過了春
鑿落盞乾官燭暗
樗蒲齒亂旅囊貧
皇天老眼非塵世
白日閒愁自替身
一段風光好如畫
未須全與路行人

王荆公墓

一丈荒墳上悠悠
落日斜子孫來祭後
守墓掃松花

野老從余話文公在半山蹇驢追不及落日寺深關
年少坐談元鍾山直北邊春風吹夢過淚浥舊貂蟬
守法曾丞相能文陸左丞風流如未泯應作寺中僧

出白下

南朝禁籞夕陽明猶與遊人作隊行煙滿天淵池上路
菜花黃盡綠陰成

遊栖霞四首

破曉逗苦霧客鼻何酸辛山中氣候異初日如燭銀田

間石獸多知是肉角麟古苔半皴腹化作蒼龜鱗兩柱
既皮紫衆碑亦嶙峋幽涂得奇觀未敢辭埃塵連年抱
離憂百嗟亡一呻花委鬢毛晚草奪袍色春愁中書櫝
失夢裏歌鍾陳窮愁著文字屢被同行嗔同行不相知
而况悠悠人

道中石麟
碑柱甚夥

吾與空門友相扶歷芳甸天機久深妙梵本與貫穿徐
馳得幽欣濟勝愜孤願宿芽發輕苞寒卉抱短艷鹿走
風生林僧歸雲入殿寺從齊梁來諸彥題品遍安知十

歲後未嘆陵谷變

優尼製銅覺欲任女主齡主稱金輪王錄在華嚴經而
捨覺富貴愛慕塗椒馨月黯回心院妖魂啼窈冥僧人
弗知此獨受一峯青分減儻及我終歲棲林坳

府帖昨夕下許奉半月急遂作茲山遊惘恍憂思失古
蹟墮榛莽久久失脩葺南塘石塔好巋然對人立高碣
纏蛟龍奇畫耐風日明旦丹陽路萬感當畢集說似石
翁婆皆須為余泣

再如金陵

再踏江東路詞窮不復論
江泥沾苦淚津鼓聚歸魂
庾信因愁老陶潛為酒存
孤蹤雖落魄不敢望明恩

道中望茅山有感

危亭對名岳畢景扶鈎欄
白鷺伺窳過低昂若弓彎
去歲負笈遊最佳元符間
櫟林帶脩竹清派流珊珊
離留叫晝靜洞天生春寒
偉哉老宗師作屋雲雨端
竟為殺蟲蟻不活升龍鸞
遺體但解蛻故宮亦燒殘
今初已半

舊萬柱扶元壇遂以兩不借一筇履巘入宅問玉斧
採芝投金環墨沼篆結字丹臺氣成盤將謂便隱遁
亦羅間關夷甫塵尾墮荀令香爐閒再獲望奇秀恍然
神觀還如見大仙伯被髮綠映山兩君控鵠從俱著漢
小冠俗累當復馳煮藥鼎欲翻

病起寫懷

夕陽蔽天涯望望不見家牛斗象緯微咄咄空咨嗟此
時將細碎說與枝上花

送友人入浙行至王冀公墓上

小縣登樓上依稀是去年更聞吹短笛飲散覓歸鷓
丹葉標寒渡黃花冪野田重來弔古地為拊石羊肩

輓轡體

楚人無事時嘗誦極元詩寫遍千山寺吟行九曲溪誰
為補天手同是決雲兒欲去無人問今宵醉似泥

金陵懷古六首

孫伯陵頭水最悲蔣侯廟內月來遲夜深行客心驚恐

猿掛晉朝楓樹枝

司馬家兒持酒栝天星亦下澆
崔嵬當時若便效牛飲
定有孟津師旅來

愁看幕府夕陽邊那更雞籠在
目前跋扈飛揚只如此
登臨那得不酸然

杳杳舊蹤尋不得茫茫遺恨有
誰窮長安敗績誰憐汝
灞上收聲未到公

琵琶未盡使人嗟瀟洒華林御
苑花今日聞韶無處所

雁煙蛩雨屬他家

江水無情碧草春
北朝留住老詞臣
子規啼向青楓樹
為爾離鄉去國人

江南曲四首

露下五更秋雨打
三楊愁齊梁才子多
埋在青山頭
郎與新歡濃儂與舊歡熟
懊惱對行人當為歌艷曲
孤館聞啼鴛日暮
胭脂薄芳醪似泥賤
那得不行樂
雲認巫山氣江通淫
雨情相逢未多時
秋花開古城

吳中秋日

郊原落葉已離離尚有孤花闋短籬
小醉不成憐病後苦吟未了說愁時
鬪雞走狗袁絲喜臨水登山宋玉悲
豆角已收無別事待同野老赴襟期

野薔薇

娟娟籬頭花白白間綠葉明光裁
版袴不掩遊子屨餘春背人去乞與
弄芳蝶感我萬古心離離不相接我行
田野間落魄何所挾猶能自撐拄使氣
學漢俠悠哉芳

草畔見此放逐妾羅帷未生夢粉面反成怯幽香薰倒
人山麝火初燭長亭或相思如見玉蹀躞

狼山

吾母禱於山生我偃蹇身卅八始入寺所天俱不晨歸
人復何之所願清戰塵勿復論銜鉤去作瑞世珍

烏夜啼

何人彈阮咸故故輕手摘彈作烏夜啼此意我所惻南
朝有帝子作妝號侯伯著身疑嫌閒生意日偏仄愛妾

聞啼聲改鎮頒竹冊故云長安吏性命在頃刻小婦聞啼聲赦令數大澤身雖不肖甚幼小著蒼憤再轉作縣佐欲塞父祖責濡墨決疑訟行求慰冤魄羣凶見之怒極意便剗磔首沮隸陽橋公議亦已格痛掠及庫胥指作盜錢賊胥既恣椎鑿手墮面愈黑書款自誣伏身竟遭刻畫酷毒一如斯誰謂彼無策謗書入外臺遂坐使者劾牽連入治城五載窮慘礫隙詞叫穹旻哀慟人巨測若無磊落者誰肯為昭白翻思受禍時何但鍛羽翮

愁冤傳里巷泣涕到臧獲
娶母偕妻孥惘惘望秋色
豈料今日下置酒設豚拍
聽此哀絲鳴但呼說不得
月明客已去庭宇鳴啞啞
世人見慈烏唾笑滿阡陌
誰知事乘除禍去反為福
蒼蒼上林枝當去作謝客

贈趙子野歌

與君雖為外兄弟語話尋常見
肝肺自從不見半年餘
每望吳雲輒流涕蘋溪松栢同一波
半年不見當奈何
長安市上相尋處弟能起舞兄能歌
兄今賜第南薰殿

滿戴宮花上林宴弟歸便著遠遊冠他時山中儻相見
吳王臺畔楊柳黃吳姬對坐調絲簧阿兄自對吳雲坐
呼弟不來應斷腸書來不應寄他物只要秋林一雙笛
當使蠻奴日下吹此時此夜須相憶

古琴歌

山人袖攜古琴來形模拙醜腹破穿上兩金字亦殘漫
自云得自十年前十年前宿野店間野店岑寂無炊煙
只將百錢乞翁媪回買濕薪煨澗泉老翁持出一木段

刀痕鑿痕斧痕滿秀才望見三嘆羨學琴以後何曾見
此是成都雷氏為措摩雷氏分明現持歸修治調曲成
曲成他人不肯聞初彈羨里可釋憾再鼓廣陵如雪冤
持歸古操次第傳龍入我舟何可憐

憶昔

憶昔在童初身輕俗累無雲霞明道服日月綴仙都屑
玉三危露泥金一丈符遨遊即閭闔佩帶或昆吾學語
闕真誥談玄校易圖竹間時搏拊松下亦携筇謫墮歸

金剛經疏 卷二百六十二
嵩壑庸凡近僕奴極知方匿景何敢遽搏扶請命書盈
紙祈真字迸珠但能覘帝座不恨守天厨譴巨知難遁
心安敢自誣相隨有芒屨還欲化雙鳧

弔堯章

相逢蕭寺已纍然自詠離騷講太元極目舊遊猶白石
傷心孤塚只蒼煙兒從外舍收殘藁客向空山泣斷絃
帝所修文與張樂魂兮應是到鈞天

遣興

望見山櫻媚短岑翻然便悔出家林壞車殺馬空嗟晚
裂芰焚荷直到今筍蕨久為歸去計雲煙無復舊來心
平生最愛花濃淡看了斜陽看暝陰

夜歸

還山迫暮夜枕石松下眠夢作童子日采花喫寒泉回
身在人世欲去塵網纏永謝歡樂情把袂入紫煙

送道友歸

浮雲起足下是子欲歸家藏室收芸蠹丹房掃箭砂時

聞搗藥鳥啼向款冬花莫使山童去驚飛逐亂鷗

黃龍洞

一從負圖與負舟天公閱之居靈湫重瞳胼手久不作
蒼苔古木兩漠漠朝來石磴鱗鱗濕如覺蜿蜒為人出
甘霖未甦焦卷多相候吳雲莫相失

歸憩仁王寺

重到招提未覺遲鉢單初副袷衣時僧房齋院門門閉
梅子枇杷樹樹垂蟻蔭經幢求託化龍纏佛座學慈悲

長年無事閒來此坐對空山諷小詩

下竺

靜看唐人刻相連坐石陰鳥啼留客意果熟住山心野
水流詩葉天香襲道林雲根有桂子應待月中尋

七言

雲竺前頭即御園小風斜雨入梅天放歌偃蹇如圓老
古貌昂藏若稚川尋得數行天寶字破他一夜草堂眠
此生更要窮經論惆悵高人舊石筵

過葛天民新居

為憶空山雨，因嗟短鬢霜。
幅巾終日仄，侍女古時妝。
烏柏殘林外，丹砂舊井旁。
不留禪月畫，只踞淨名牀。
湖鏡秋容淡，雲莊曉露香。
汲泉須透脈，種果便成行。
使鶴過村店，攜孥上野航。
極知秦外叟，全似賀知章。
對佛稱居士，翻經悟法王。
自將詩檢校，猶與竹商量。
嗟我渾無賴，非公不作狂。
莫移松下石，老子要乘涼。

十月過鳳山舟回入項王祠月前韻

墜葉濃於染孤花淨似霜溪山如有待朱粉已施妝勝
境如天上雄鳴自帝旁工陳白玉瑄人坐紫金牀古兕
稱春酒靈虬換夕香風箏猶有韻星弁忽分行念此鋤
榛壟頻來渡葦航欲揮終極淚只廢苦吟章慷慨辭歡
伯英雄憶憤王迹駢嗟弗及撞斗恨難量起舞何勞短
行歌未要狂斷雲將落日千古助哀涼

送蜀客

都市令重到文園更倦遊依依返窮峽得得上歸舟往

事深能憶沈痾久合瘳行經古祠廟應酌舊山丘梁父
遺馨在降牋殺氣浮白衣猶肯出黃裏不包羞一聽巴
人曲多貽漢璽憂花蒙塵漠漠苑抱水悠悠蠢爾狂童
輩俱為滅族囚坤維元自正棧閣未應修管樂誰能並
卿雲亦可儔時哉著檇杌聊此畔牢愁砑硃重開險銷
沈萬壘秋堂留石室盡歌尚竹枝謳寒蛩推逋客啼鷓
識故關屈沱嘗角黍岷嶺看牽牛從此多談讌逢誰共
勸酬近前持硯削成列抱篋篋近歲安樞相宣威在益

州君歸如訪謁朝論必咨諏列聖方垂統羣公亦好脩
焚燒已郿塢誅殛皆驩虎豹參差束魑魅次第投衣
寇通海嶠干羽格蠻陬江寇何勞服淮田亦盡收旌旃
仍使傳炮烙任兜鍪元象催天狗昌陵控玉虬嗟嗟几
上肉斷斷幄中籌貢錦資藩輔緘辭告帝謀聲名與勳
烈應逐漢江流

戊辰感事二首

久要和平福須寬次第刑諸公善調壹熙祚必清寧夾

道焚香拜令知病酒醒漫勞雙鬢白何止故山青
闕緯
朝沈彩非煙夜透扃願同臧獲列齊壽八千齡

幕府才方盛軍師意最高何年燕巢木幾處馬騰槽
馳騁心方壯指麾身更勞周詩歌勞徠費誓說逋逃行闕
占風角穹廬拜羽旄飛騰真有種淡泊正相遭

山居書事

荼靡架倒無人架全似老夫狂醉時昨夜一場溪雨橫
又漂苔蘚到花枝

兩宋名賢小集卷二百六十二

欽定四庫全書

兩宋名賢小集卷二百六十三

宋 陳思 編

元 陳世隆 補

方泉詩集

周文璞

遊洞霄

天柱青峩峩石筍危不墮
晃晃銀雲收誰子開玉鎖
崩

騰放開水焜燐入洞火神境借靈休乃欲搜碎瑣媿此
朽濁顏一得在無我致彼老鑄疑披褐迎路左逗留護
銀鑿被業盤礴羸玉篴付九虎遊宴升峯礮為言子速
去勤苦悔坎軻反樸招太和當免運劫禍慟哭出青松
殘齡其或可

題喻玉泉家亦可樂亭

先生亭非伯夷築亭柱亦用秋山竹但令家有滿架書何
慮妻兒少饘粥朝來相對亭上賓洙泗尺度羲皇人先

生已死名不泯常與此亭作標準後來鄰觸闕伯怒僕
夫預起池魚慮拆亭拆亭先拆柱有孫抱柱出煙去三
十年餘復改觀有孫如此不待贊似魯靈光偶不全今
人見此空三歎

病後

風燈露水雨茫然莫為歡華少壯年無病更須求藥物
愛閒猶要覓緡錢此生身世柳榆裏末路光陰泣涕前
快出囊中食玉法白雲深處日高眠

上冢

蒸魚燔肉當好羞北面百拜如有求願身長健兒孫孫
歲歲此日燒松楸紙錢灰盡淚不盡孤也雖在猶拘幽
泫泫金蓋山下水相逢直過龍灣頭

送人歸苕溪

古王祠廟桃花下愁苦看春又隔年今夜白蘋風更惡
去時須傍采菱船

歐陽琴歌

嗚呼箇是文忠琴嗚呼此琴今尚存堂中圖書散失盡
留得七絃傳子孫六言自書書在腹古錦梅花留不得
嗣孫賢者能忍貧不向豪家博珠玉初鼓如撼茂陵松
鞏原流水青溶溶三宗龍袞在帝左魯把鈞天賜與公
再鼓似播清潁水只將漱流肯洗耳曾蘇兩生招不來
自寫新聲付兒子堯囚山舜放野自茲以下不平苦與
君所得婦女謗此日一洗清萬古小儒昔誦五季傳頗
訝春秋體微變今來再聽七絃琴南薰遺製喜復見浮

雲流盡白日逃何用廣陵與離騷譜成只度歐家曲秋
聲賦共廬山高

琴有公題

歸姑蘇

舊巢已是別人門梅自蕭疎柳自昏河北謗來須混俗
江東讞就欲招魂故王未納耶溪女越相先尋澤國村
懷古感今吟不盡一雙清淚滿醜樽

晨起

閉門不與俗人交元晏春秋日日抄清曉偶然隨鶴出

野風吹折白櫻桃

礪上小飲

方坐愛蠲潔俯窺為回縈汲汲雨露澤悠悠江海情引
之灌蔬圃亦足發光晶陶然未須去於焉潛我名

送道人歸華陽

山中無酒禁處處有松醪旋汲泉炊飯多挑筍助庖天
燈將出現野月未能高憶我初遊日先將石鼓敲

寄茅山道友三絕

伏事三茅過一生癡心不望羽車迎
舊時手種黃龍子
今解升雲入太清

九錫碑亭日欲曛
有人跌坐對爐薰
憑誰傳語桓司馬
句曲山中只白雲

藥珠宮女傍瑤屏
自把韋編問姓名
回到人間無一事
紫陽花下白雞鳴

秋日孤山道院

孤山有何好脩竹
隱樓居人在秋雲
杪香凝午醮餘芳

林多落果靈沼少驚魚歸棹聞歌詠猶如學步虛

寄韓礪泉漈

窮冬孤陋只書癡肯為凶荒強忍飢師友淵源似公者
輿臺貧賤亦安之人來山縣猶須債雨映茅簷但要詩
欲詣樓居無逸步要從老手化神奇

訪梅二首

起看重霧白漫漫畧見春風在樹間傍水出籬猶未快
淡煙微雨又青山

幽花墮在石根旁，幾欲移將近。
草堂草草一樽聊，爾爾跨驢歸去月荒涼。

呈鞏睡翁

豐

家本汶陽縣，累世事耕蠶。
室廬既焚蕩，飄零住江潭。
幼及識故老，頗聞鄉里談。
最盛陽和時，梨杏春酣酣。
岱宗富枯栢，孔林存攬檀。
鄉閭鼎其中，寶號玉檐檐。
去年拜睡翁，知是山堂孫。
淵流京洛舊，尺度歐梅間。
昨夢返故里，有翁作司南。
俚語馳寄之，何以鑄冥頑。

石林

蒼蒼一石林零散少存者分攜多子孫不勝落田野虛
堂有天就乃在絕壁下存者寧非真散者亦已假相君
久藏山遠客初繫馬幽玩埋莓苔孤躅坐梧櫝方咏茲
游清未敢泥風雅

絕句四首

巾車初扣槿花籬物物來前總要詩一句坐來摸寫了
兩鳩飛下老梅枝

紗籠解散坐門畿生怕逢人索接羅朝雨洒來山更淨
春聲恰好到芳池

解呼威羽歸丹穴可縛單于獻漢宮四面八方籠不住
許來分坐此山中

隔林八十龐眉叟理竹疏泉過一生見說石林身健日
把書只在石中行

客中

客中時序又匆匆孤坐初春小雨中弄水攀松去年事

令人憶殺洞霄宮

山樂官

山樂官爾誰魂逃河入海俱奔奔伶倫梨園何可論山
樂官予欲爾兮無言如有言為余歌雲門

烏媒

一自弋者篡冥飛亦云多庖犧網未收同類如予何已
噤伐斧篇去去依女蘿

和澗泉賦山楹

共惟古至人用意事物表一丘漫摧殘八極自圍繞不
勞日月運坐見歲時了魯夢久不作楚賦那遽曉既煩
匠氏來誰謂此山小雲衣方分數雪幹復夭矯沐浴抱
歸藏樂甚憂悄悄

重經洞霄

曩既負幽討今敢萌遐心扶桑下陽馭磬磬浮空林瓊
臺渺跼蕩藥珮棲高深屢見仙驥舞遙聆元女吟如遂
覩開闢那復憂崎崿抱關職貴重啓閉非所任靈飈掣

虬戶同此琅琅音願併翠綃水寫之朱絲琴

大滌洞

嵌空纜入泉滴滴隔几倒懸若錐立道士云是閭丘公
入向華陽便門出

岸幘

岸幘坐亭臯休嗟命不遭通幽文似呪招隱句如騷日
下桃花熱風低鶴背高真遊窮不盡只是酌芳醪

翠蛟亭

禹驅龍蛇不驅蛟依然踰此山之坳有時淵渟忽奔放
如負山走如玉跑昔時萃渭正如此咨爾來者無空嘲

寄題館娃即靈嵩寺

突兀僧藍是館娃廡廊猶自隱晴霞清明但長離宮草
精魄應棲野寺花白苧黃蕉迷鶴市紫蘭綠芷屬漁家
思量種蠶成何事空使君王式怒蛙

小寒食

從來寒食多風雨不料窮鄉亦管絃壯歲心情悲昨夢

異鄉時序感流年，偶隨遊子來溪上。
因與棠梨立路邊，從此堪悲轉憔悴。
隨羣同上釣魚船。

五月五日至京口

回回望秦淮，出語重煩喋凱風。
初酸辛靈雨，更淒切時。昔之所經望見心，已折粵從世態。
換轉見凡事，別緡錢。換仍艱旅飯，雜砂屑坊市半頽毀。
物貨僅羅列，鳴鳳斯下。聞遺沴猶慘烈，凌晨轉時序。
涂路已入浙，景清雖快人。忍作昌歎節，身本無瑕疵。
反被讒口謀，低翔就師友。

庶幾免摩滅清曠雖未能元暢差可悅如其守微言予
將俟來哲

贈蘇召叟

句容縣古寺壁有道元筆晃晃纓絡軀渺渺烟霧質一
堵最先怪未泥久湮鬱泥去墨亦盡慘淡意多失恨不
還其人相隨急鞭扶毀棄加弗敬請論如漢律羅漢院
塔影顛倒難致詰稗書誌海翻此理殊未必今居所歸
路正向此中出况有弔古才仰天痛呼屈勿稱荒唐言

析理資按述其餘傳播詠淋漓滿箱帙棲霞者悲壯茅
洞者清逸珍題倘相命當第為甲乙

半山寺

野芳汀芷互幽妍相國風流亦未傳袞冕塵埃半山寺
自相撐拄過年年

跋鍾山賦二首

丁年寫了鍾山賦舉向禪宮入定僧僧却為余言未好
扶行同謁晉諸陵

往在秦淮問六朝江樓祇有女吹簫
昭陽太極無行路
歲歲鵝黃上柳條

過鳳山有感二首

當年準凝作家林溪墅樓居意已深
隱者自應尋別業
鳳兮何肯負初心
參差一段囊中玉
激烈三更月下吟
若不速來相就飲
定行從此失知音

秋蕪闕是草堂基
惟有南隣盡得知
辛苦置家將守冢
告求廣地要穿池
淨蓮已付鄉僧掘
慈竹從教墓客移

雖向龍灣作者舊此生寧沒暫來時

絕句二首

臯伯通家鎖夕暉八年寒食盡歸期
江鄉橘柚花如雪不許離人戴一枝

入春便與僧為友紫萼黃英見坐禪
昨日鄰翁催入社謝他只是說無錢

辛未九月晦日

遺體只母身哀哀勿重陳一貽泉壤憂兩見
霜露晨繁

霜與重露塗抹隨荆榛身即未殞滅強與松栢春遂於
搖落中見此天地仁玄鳥已辭社蓐收方降莘拭淚呼
秋旻何由酬艱辛

閒居日有幽事戲作

竹暗僧窺戶莎寒鶴上廳壁懸陳處士屏貼少微星壘
甕為蔬圃埋盆學蓼汀自知癡得計常用醉為醒野客
兼稱僕幽禽代作伶浴鳧翻落磔鬪雀墮空庭算數推
三甲防身召一丁案頭松葉響牆角柚花馨枕度堆書

菱醪罨隱粟餅茅茨隱煙雨雞犬也忘形

苦錐歌寄澗泉

我園秋果枝纍纍縹青紺黃夾相持役夫牧人記註之
所佳尚者惟苦錐苦錐兩株結蒙密追惟丈人語天出
遂欲供之作籩實他往返舍百無一乃被猿狙打都畢
摧藏睢盱以自佚季冬初旬日協吉寒風急霰俱洌粟
自慚曩者信已失作歌獻焉効詼謔

臘月八夜雨

愁雲欲雪未成雪忽聞寒雨夜淋浪但知歲月墮寂寞
不晤乾坤發艷陽天黑鬼車聲更大夜闌客枕夢初長
明朝起視籬砌下草芽浥浥又回黃

送礪泉

一自接道誼形容生輝光束情謝流宕捧詠增慚惶矯
足時切闕雲海何顏唐長安賣藥市董董十載強復綴
守藏史得近中書堂心計常自珍孰云失其防稽首謝
衆去酌酒相扶將融風促綠蔭代謝日夜忙石澗流自

湧玉山未欲長安得便奮飛相從決高翔

送薛子舒

龍泉餞語餘便使借舡居津吏方抽木官人但載書朝
通白矜石身近碧鯨魚一卷新文就臯禽亦自如

晚菊

亭亭砌下黃金花霜後顏色如矜誇元英摧挫百卉盡
獨自照耀山人家湘纍晨餐不論數千歲高丘恐無女
君不見天寶杜陵翁晚節常為少年侮

誦哀江南賦

高橋沙水涸臺城蔓草纏下有煩冤人誦此危苦篇我
生楚臣後身在江楓前但見去魂遠不見歸魂還惟昔
愛好詞細碎窮註箋中間多佚事他書亦不傳極欲補
闕漏今方長棄捐重効嘈噴聲庶幾與周旋

簡正字南仲

白髮梁鴻學暮猿不辭引領望兄門久勞清夢相追逐
猶喜遺經共討論數葉赤楓鳴客路一畦黃韭憶家園

著書不就身何用每見飛塵恨滿軒

重遊棲霞

林麓已盡虎不見邇來流民所蹂踐殘僧自言昔遭變
藏經理象猶可唁流泉鳴悲雨摧殿滿嶺慈相沙汰
厭白黑綴粘或壞面慧命弗絕如斷綫况我憂患經歷
遍見此悲酸尚兢戰千聲萬聲走出門門外秋花泣餘

注

出溪

二月天景佳波清見魚蝦望中何所好溪女摘蘋花淺
溪猶可涉素手花似雪隔港聞謳聲風來正相接

過舊居遇隣家子述懷

憶昔玉雪時最感鄰媪嫂剪羅作髮鬢漆璣綴紋襟今
回遇孫枝面墨體枯槁念彼舊宅凶災釁失依保此生
未還役况復念家道冷節返鄉閭江路見芳草奪恃罹
荒饑連歲愁浩浩流離在山縣只有泉水好野櫻聚紫
玫街弄晴日杲半為烏雀盜半被奴婢討風霜必盡護

盤釘如拱寶坐薦一瓊春便是舒遠抱

正字南仲祭詩

昭陽作噩令愁雲凝上蒼我墮溪谷底鹵莽聞公喪哲
人困中壽頗間時若狂繼執印吏符躑躅抽肝腸又聞
斂魂魄玉色貌愈強環泣甚危苦精氣都不揚一朝委
垆地千歲還天常我冠謝成均射策何巍昂連踐中秘
書檢校四庫藏象緯識校尉篇編嘉議郎麟遊夜閣黑
鳳去旻霄黃惟初典郡學吐血謗可傷積壘高於山黨

歎空銷亡故老解噓枯
新人工絕吭灼灼藻火衣可使
綻作裳竟罷奉面對射策裨君王
愧負臨軒思穹林摧棟梁
往者流傳誣聖賢失隄防
頽裂在眼前悽愴遙相望
二紀獲敬事實亞衿珮行常竊季弟稱朽穢敢自將
東教濡雨露采擷參差香
雖罹顛沛憂夢寐敢自忘
翻思說待對按述何微茫
嗟此盛壯時傾耳殊匆忙
但覺異香濁安知為死生
髮櫛達細碎羅列置篋箱
前年日重九西歸舊臺城
蒙索新句詠孿縮紙半張
卷頭七字

吟持以獻我兄稱許極銖兩逢人便增評出示輩維跋
文字逾西京鼎器寫饕饕肉趨兩自長款曲彌日留振
刷家苑翔池水正清潔碩果亂縱橫斯時惜晚暮元袂
歆秋陽徐步引升欄如訴後別殃命之返里廬憑藉蜚
晚英讀書與析理旦旦拘限程爾搜嵩礪微乙亥事頗
詳謹勿摹卷記眎此小傳成亦勿痛揀擇因筆為文章
倚櫂望江浦披棒穿翳荒掬擊祛鬼野鄉志始竄更警
策入心腹陟謂千駟輕誰子料承應纔開一齋羸勅厨

具節饌髻舛糕菊芳終席岌飛動漏下樓鼓鏜劃見睽
孤占炎炎拖晶熒姬孔情可測一身行自當日斜亡集
舍蠹蛻亡妖祥國典嗇左丘地下收回商師門錫休誄
慟哭發幽榮膝抱條怙悵薛譔方施行茂洪既慕綴仿
佛日月先門戶變化久咫尺未可量貧疾累祭緩偶然
值清明雨寒送魂來素筵見親情熟食侑介推覆栝啐
后皇諒此心靡他度幾下歆饗

弔友人朱子大

罷居越上其屋為勢家所有

與君昔並丹陽船形容憫愴俱可憐自說宅園及百年
藏三小山出雲煙土伯小廟自題扁持照清池分醜妍
吁嗟先君方下世姪子賣牛相炒煎出尋方伯待救護
與我密者纔萬錢是身災疾恐彫謝語未脫口吁皇天
那知君今亦逝川洪崖白石夢杳然欲從他姓改受廛
嗚呼朱君無歸來歸來但見空屋椽入抱山骨於黃泉

挽正字南仲四首

千古應無恨諸公竟不能要令參溟滓端合罷飛騰白

草傷麟野蒼山下馬陵有兒持手澤淚落照書燈

卷舌空沈彩芸香亦盡賢幾時噫鳳沼一旦感龍泉遠
播雕題外高垂若木邊煎膠差不及遺碣暝臺懸

珠璧方輝耀菁華未寂寥極知身作祟何用食為妖犧
象收儒廟簫笳咽市橋傷心紗帽冷三徑雨蕭蕭

一自初聞報哀號向草堂相隨只兒子遠和有山獐土
沃幽宮掩灰凝奠酒香孤身揮泣盡松柏便萎黃

行歌四首

雪壓門外土骨堆一番兩番春始回歸來但見鄰舍換
老樹紅花如死灰商量千古有何事經營八紘非汝才
乘除幻變既如此何不快呼鸚鵡枯

天讒天讒先照戶返舌轉枝啼更怒九霄跌蕩帝座高
老我此身無告訴舍傍種園翁作鄰一方泉今在中庭
齊民書在泉有銘誓持團結為林垌

春霏霏兮秋靡靡嘆息賞音人已死堪嗟玉屑綴空條
可奈芳蕤逐流水融怡艷冶恨欲銷世間風雨何寂寥

有誰肯為吹簫往和蟋蟀諧鷓鴣

先秦古書世已稀國風雅頌聲又微彼美人兮在天路
馬羆局兮將安歸古人所懷已汨汨今人所懷已忽忽
我亦東西南北人相逢且盡括中物

遣興

山中雨更愁不是棄吾州懷母未能去訴鄰誰肯留茶
人窮似虱藥戶狹于舟一礪多深碧嘲吟尚自由

孤山桃花二首

天上仙人休擲火塵中
道士莫燒香可憐絳雪
渾無賴
一簇千枝對草堂

莫向蓬蒿恨不遭
夢曾釣海山鼇
當時不合輕仙事
惆悵靈風滿碧桃

送人之武夷二首

精舍人歸入內臺
遺基處處有芳埃
小儒更合修壺史
刊落乾魚說水苔

終向名山度此生
此生吟骨要猿擎
洞宮終與人間別

六六峯高削紫瓊

秋晦有懷南仲正字

懷人幾日惡，况復值秋陰。
天亦容清調，人難識素心。
他鄉誰饋肉，永夜只聽琴。
高詠龍泉碣，相從發至音。

贈孤山道士二首

九霄象簡手中擎，豈是閒人愛列卿。
洞裏石田春漠漠，有田多與種黃精。

清夜古洞無猿嘯，自覺尋行幽意微。
處士橋邊增悵望。

幾回瓢酒對斜暉

送友人至桐栢

牛溪松黃堆碧波
狂夫於此欲如何
洞天春晚歸不得
司馬悔橋芳草多

送髯高謁方巖

客舍窘積雨出門令始晴
藥苗隨野飯燕子看山行
大道白日晚閒汀
綠芷生方巖相見了為謝
草堂兄



兩宋名賢小集卷二百六十三